

EW NAMOPUNG

A FORATA EW PROGRAMEN ATTAWEN NEEKOT IKA NENOM; A PWAN AWORA INIK ME NIMU NGOROU CHANA (\$35,000) REN FAN ASENGESIN EI PROGRAM.

EPWE PUNG ME REN EWE TRUK DISTRICT LEGISLATURE PWE:

Tetten 1. Ekkesiwin. Itenap 5, me non ewe Truk District Code, iei a ekkesiwin ren an epwe pwan kapacheta ew Sopun, epwe iei ussun napanapan:

"Sopun 5.

Programen Attawen Neekot me Neenomw.

Tetten:

Tetten 71. Forutaan.

Tetten 72. Masowen me Aukukun ewe Sukun

Tetten 73. Etipeewin Kamo me Aea

Tetten 74. Tumunun

Tetten 75. Kaworen Monien Iteiten Ier

Tetten 71. Forutaan. Iei a foruta ewe programen attawen neekot me neenomw, fan asengesin an epwe kawor sein attaw mei for seni ferrocement, seni ewe Programen For Boat non Chuuk, epwe pwan kawor pisekin woon, reen materials me supplies, pwan ren an epwe wor angangen asukuna aramasen Chuuk non pekin attawen neekot me neenomw, wawaan ekkewe sein attaw ren attawen neekot me neenomw pwan ren forun etipeewin kamon me aean ika wawaan ekkewe sein attaw me ren ekkewe ra wesewesen awesi ewe sukunen attaw.

Tetten 72. Masowen me Aukukun ewe Sukun. Ewe Program epwe pach-onong ew angangen asukun non, epwe ikkei masowan:

- (1) Wawan, tumunun, forsefanin ekkewe sein attaw;
- (2) Napanapen mweesinen ekkewe wa, amwokutun me amanaween ekkewe mwesiin, pwan tori four ika ra ta;
- (3) Amwokutun ekkewe wa me angangen saai;
- (4) Napanapen attaw, pisekin attaw, me pisekin waa, pwan supplies me materials; pwan
- (5) Tumunun angangen an fori sopai me amomono niapan.

Tetten 73. Etipeewin Kamoo me Wawaa. Fansoun amwuchchunoon ika wesinon ewe sukun, chon wesewesen awesi ewe sukun repwe tufichin fori etipeewin ar repwe wawa ika fen mooni ekkewe sein attaw mei kawor me ren ewe program. Ewe a wisen tumunu ewe Program, epwe fori ika awora taropwen ewe etipeew ngeni ekkewe ra awesi ewe sukun, mei pwaano pwe ir mei wesewesen tongeni, mei pwano nupwen chok ar chiwen fiti ewe sukun, ren ar repwe fori ar we angangen sopain attawen neenomw me neekot. Ren kapasen me masowen ewe etipe-ew, epwe chok fiti tipen ewe a wisen tumunu ewe program.

Tetten 74. Tumunun.

(1) Ewe Meinapen ewe Pekin Neset (Marine Resources) non Chuuk, epwe wisen chon tumunu ei program, iwe epwe awora repotun me mwokutukutun ei program ngeni ewe Truk District Legislature, non ika mwen May 1, non ewe fiscal year mei kawor ewe program ngeni.

(2) Met ukukun moni mei tonong seni monien ewe etipeewin wawa me kamoo, epwe nomwetiwen ren ewe Pekin Neset (Marine Resources), ren an epwe nounou ngeni mwokutukutun me angangen ei Sopun.

(3) Chon sukunen ei program repwe angei ukukun wonu chana (\$6.00) pwe aninnisin emon ew ranin angang nupwen fansoun mwokutukutun ewe sukun.

Tetten 75. Kaworen Monien Iteiten Ier. Iei a mumuta an epwe kawor moni iteiten ier, seni ewe Monienapen Legislature, won ukukun met ewe Legislature a mefi pwe epwe naaf ren mwokutukutun ei Sopun."

Tetten 2. Kaworen Moni. Iei a kawor ukukun inik me nimw ngorou chana (\$35,000) seni ewe Monienapen Legislature, ren monien ewe Programen Attawen Neekot me Neenomw.

Tetten 3. Tufichin Nounoun ewe Moni. Ei moni mei kawor epwe chok nonnomw ren an epwe nounou ika kakkatou ren ei Program.

Tetten 4. Poputan Pochokkunan. Ei Namopung epwe poputa pochokkunan fansoun chok an a kapunguno me ren ewe Kepina non Chuuk, ika fansoun chok an a pusin winiti Annuk, inamwo ika esemwo chiwen kapunguno me ren ewe Kepina non Chuuk.

Sain seni: Koichi Sana
Koichi Sana, Speaker
Truk District Legislature

Annetata: Datasy Albert
Datasy Albert
Legislative Clerk/Secretary
Truk District Legislature

Pwinin maram: 7/29/76

Kapunguno seni: Mitaro S. Danis
Mitaro S. Danis
District Administrator, Truk

Pwinin maram: 8/9/76